

## Jangan Bertangguh

Daripada Ibn Umar R.Anhuma katanya, Rasulullah SAW memegang dua bahu seraya menasihati:

كُنْ فِي الدُّنْيَا كَأَنَّكَ غَرِيبٌ، أَوْ عَابِرُ سَبِيلٍ. وَكَانَ ابْنُ عُمَرَ رَضِيَ اللَّهُ عَنْهُمَا يَقُولُ:  
 إِذَا أَمْسَيْتَ فَلَا تَتَنَطَّرِ الصَّبَاحَ، وَإِذَا أَصْبَحْتَ فَلَا تَتَنَطَّرِ الْمَسَاءَ، وَخُذْ مِنْ صِحَّتِكَ  
 لِمَرَضِكَ، وَمِنْ حَيَاتِكَ لِمَوْتِكَ

**Maksudnya:** “Jadilah kamu di dunia seperti orang asing atau orang musafir. Dan adalah Ibn Umar R.Anhuma berkata: Apabila kamu berada di waktu petang, maka jangan kamu tunggu waktu pagi, dan apabila kamu berada di waktu pagi, maka jangan kamu tunggu petang. Ambillah dari masa sihatmu sebelum datang masa sakitmu dan dari masa hidupmu sebelum datang kematianmu.”

Riwayat al-Bukhari (6053)

### Pedoman dan Iktibar Hadis

Antaranya:

1. Orang yang mengerti nilai waktu tidak membiarkan waktunya habis dengan percuma, tetapi dipenuhinya dengan amal yang berguna. Ini kerana dia sedar waktu adalah umurnya. Habisnya bererti kurang umurnya dan kurang pula amalnya. Padahal, amal itulah persediaan hidup yang paling bermanfaat untuk sepanjang zaman.
2. Ibn Umar R.Anhuma dalam wasiatnya itu berkata: “Gunakanlah dari sihatmu bagi masa sakitmu dan dari hidupmu bagi masa matimu.” Ini bererti masa

sihat dan masa hidup di dunia hendaklah digunakan sepenuhnya dan sebaik-baiknya untuk amal dan pekerjaan yang berguna untuk mendatangkan faedah di kemudian hari dan hargailah masa yang tersebut itu sebelum datang masa sakit dan masa mati.

3. Bagi orang yang berjaya dan yang mengejar kejayaan selalu berpendapat bahawa waktu adalah pedang, memang benar kerana melewati waktu sedikit sahaja bererti kerugian yang akan didapati dengan berpedang pada kelemahan itu akhirnya mereka yang mengejar kejayaan akan tangkas merebut waktu. Jika seseorang semestinya melakukan puasa dan sembahyang fardu, mendapat halangan untuk mengerjakannya seperti sedang sakit kuat, bagi orang yang berpuasa atau sedang melakukan perjalanan jauh, maka ia boleh mengqadaknya pada waktu yang lain. Mari kita renungkan firman Allah SWT yang berbunyi:

أَيَّامًا مَعْدُودَاتٍ ۖ فَمَنْ كَانَ مِنْكُمْ مَّرِيضًا أَوْ عَلَىٰ سَفَرٍ فَعِدَّةٌ مِّنْ أَيَّامٍ أُخَرَ ۗ وَعَلَىٰ  
الَّذِينَ يُطِيقُونَهُ فِدْيَةٌ طَعَامُ مِسْكِينٍ ۖ فَمَنْ تَطَوَّعَ خَيْرًا فَهُوَ خَيْرٌ لَّهُ ۗ وَأَن  
تَصُومُوا خَيْرٌ لَّكُمْ ۖ إِن كُنتُمْ تَعْلَمُونَ

**Maksudnya:** Iaitu dalam beberapa hari yang tertentu. Maka apabila di antara kamu ada yang sakit atau dalam perjalanan (lalu ia berbuka). Maka wajiblah berpuasa sebanyak hari yang dia ditinggalkan itu pada hari-hari lain. Dan wajiblah atas orang-orang yang berat melakukannya (jika mereka tidak berpuasa), membayar fidyah (iaitu), memberi makan seorang miskin. Sesiapa yang dengan kerelaan hati mengerjakan kebajikan maka itulah yang lebih baik baginya dan berpuasa lebih baik daripadamu jika kamu mengetahuinya.

(Surah al-Baqarah: 184)

4. Di antara waktu yang memestikan seseorang Muslim melaksanakan kewajipan-kewajipannya adalah seperti ketika kecapi nikmat, cubaan ketika melakukan amal atau kebaikan dan ketika melakukan maksiat. Ketika beroleh nikmat seorang muslim dimestikan supaya mensyukuri nikmat yang telah diterimanya. Rasulullah SAW bersabda sebagaimana yang diriwayatkan oleh Muslim, maksudnya: “Sangat mengagumkan keadaan seseorang mukmin. Sebab segalanya amat baik baginya. Dan tidak mungkin berlaku seperti ini kecuali bagi seorang mukmin. Jika mendapat nikmat, dia bersyukur maka syukur baik baginya dan jika dalam kesusahan dia sabar, maka kesabaran itu baik baginya.”

5. Lalu ketika mendapat cubaan dari Allah SWT kewajipan yang mesti segera dilaksanakan adalah bersabar dan menerima dengan ikhlas apa yang sudah menjadi ketentuan Allah SWT, dalam hadis riwayat al-Bukhari dan Muslim bahawa kesabaran itu adalah terletak pada pukulan yang pertama dari cubaan tersebut. Maksudnya sebaik sahaja mendapat cubaan, maka saat itu juga kita mesti bersabar. Jika tidak demikian, maka syaitanlah yang akan menfaatkan keadaan tersebut dengan sebaik-baiknya hingga mungkin kita akan terjerumus di buatnya.
6. Adapun kewajipan bagi seseorang yang melakukan ketaatan adalah menyedari kemampuannya untuk berbuat ketaatan tersebut adalah pertolongan dari Allah SWT dan bukan atas usahanya semata. Sedang bagi orang yang berbuat maksiat, maka kewajipannya adalah segera bertaubat dan memohon pertolongan kepada Allah SWT supaya tidak mengulangi lagi perbuatannya itu.
7. Berikut adalah pesan dari khalifah Umar bin Abdul Aziz (khalifah ketujuh dinasti Umayyah) yang keadilannya hampir sama dengan Khalifah Umar bin al-Khatab, bersetuju supaya kita tidak mudah tergoda untuk melakukan dosa. Pesanan beliau, iaitu: *“Wahai sekalian manusia, janganlah kamu menganggap kecil sesuatu dosa. Selidiki dan usahakanlah untuk mengkikis habis apa-apa yang telah dilakukan dengan cara bertaubat (Allah telah berfirman yang ertinya) sesungguhnya perbuatan-perbuatan baik itu akan menghilangkan segala perbuatan-perbuatan jahat.”*
8. Itulah peringatan bagi orang-orang yang mahu berfikir. Selanjutnya beliau berkata: “Sia-sia dan rugilah orang-orang yang keluar dari rahmat Allah SWT yang meliputi segala sesuatu dan dia telah mengharamkan mereka masuk syurga yang keluasannya seluas langit dan bumi. Ketahui perasaan aman pada hari esok (kiamat) nanti tersedia bagi orang-orang yang takut akan tuhaninya, iaitu orang yang suka menjual barang yang sedikit untuk ditukar dengan yang banyak, orang yang suka menukar yang fana dengan yang kekal.
9. Pelaksanaan kewajipan dari waktu-waktu yang disebutkan itu tidak boleh diqadak. Hal ini kerana waktu itu terus berubah dan berganti-ganti. Dan jika sudah berubah atau berganti maka sudah tentu kewajipan yang mesti dilaksanakan pun akan berubah dan berganti. Tetapi bagaimana dengan kita? Memang pedoman seperti itu sering kita ucapkan, namun dalam pelaksanaannya kita selalu membuang-buang waktu secara sia-sia. Kita mesti mengakui secara jujur sebagai pembetulan diri. Apakah kita selalu memanfaatkan waktu dengan betul? Atau hanya sekadar untuk kata-kata?

10. Ramai orang ternama yang tidak pernah menyisihkan waktu untuk hal-hal yang tidak bermanfaat, misalnya untuk hal-hal yang tidak dapat mendorong ke arah kerjayanya. Jika mereka rehat dari pekerjaan, selalu memikirkan langkah-langkah selanjutnya supaya mencapai matlamatnya. Mereka tidak akan mensia-siakan waktu yang dimilikinya berlalu begitu sahaja.
11. Jika kita ingin berjaya seperti mereka, maka kita mesti pandai berjimat waktu, pandai mengatur waktu. Jika ada waktu lapang, sebaiknya kita guna untuk kegiatan yang merujuk kepada kejayaan. Buanglah budaya malas dan gantilah dengan tindakan-tindakan yang bermanfaat. Kita mesti yakin bahawa diri kita lebih mampu dari orang lain. Kita mesti yakin bahawa kita boleh melebihi mereka. Dengan berbekal keyakinan itulah, kita mengisi berbagai kegiatan, misalnya membaca buku yang dapat dijadikan pedoman sebelum berusaha. Banyak contoh dari orang-orang ternama yang berjaya mencapai cita-citanya kerana mengisi waktu lapang dengan membaca buku-buku bermutu.
12. Orang-orang yang berjaya menggunakan waktu dengan sebaik mungkin. Meskipun selalu sibuk dengan pekerjaannya, tetapi masih boleh membahagi waktu, sedangkan pada kebiasaannya orang-orang seperti ini telah membuat jadual kegiatan yang ketat. Kemudian melakukan tindakan sesuai dengan jadual tersebut. Kerana sudah terbiasa, maka jiwa akan merasa terpanggil jika tidak melakukan kegiatan yang dituntut oleh jadual. Akhirnya ia seolah-olah menjadi sebagai suatu kewajipan yang dapat membawa dirinya kepada kejayaan.

### Mutiara Hikmah

- ❖ **Pujangga berkata:** Orang yang malas dan suka berlengah-lengah adalah orang yang membuat orang di sekitarnya tertanya-tanya dan yang menderita kesedihan, dalam erti yang sebenarnya. Sedangkan orang yang serius bekerja adalah orang yang tahu bagaimana sepatutnya hidup dan bagaimana mendapat kebahagiaan.
- ❖ **Pujangga berkata:** Hindarilah kata pengandaian "jika..., maka, nanti, akan..." menanggungkan pekerjaan dan menanggung-nanggung kewajipan. Ini kerana ia merupakan tanda kegagalan.

## Kisah Teladan

Mendiang HP. Howell ketika menjadi ahli lembaga pengarah U. S. Steel, mesyuarat yang diadakan oleh badan itu seringkali memperkatakan banyak hal yang telah lama sekali tidak diputuskan. Banyak sekali masalah yang dibicarakan dan sedikit sekali keputusan yang dibuat. Hasilnya, masing-masing anggota dalam lembaga pengarah itu harus membawa satu laporan untuk dipelajari di rumah.

Akhirnya Mr.Howell memujuk pengurusnya untuk segera memecahkan masalah ketika itu juga dan dengan demikian boleh segera dibuat keputusannya. Tidak ada penangguhan, tidak ada penundaan. Harus segera diambil keputusan apakah kita ingin melakukan sesuatu atau tidak melakukannya sama sekali. Memang kenyataannya banyak persoalan yang tidak boleh segera dipecahkan. Misalnya kerana harus menunggu laporan berikutnya. Tetapi setiap persoalan harus segera dipecahkan sebelum datang masalah yang lain. Mr. Howell menyatakan bahawa hasilnya amat menakjubkan dan luar biasa. Segalanya selesai. Setelah tidak ada seorang pun di antara mereka yang harus membawa laporan untuk dipelajari di rumah. Tidak ada perasaan cemas kerana merasa tidak boleh menyelesaikan persoalan yang dihadapi terus-menerus.

Ketertiban yang baik tidak hanya berguna bagi anggota lembaga pengarah U.S. Steel sahaja tetapi juga berguna bagi kita semua.